

VENDIM
Nr. 3, datë 17.1.2013

**PËR DISA SHTESA DHE NDRYSHIME NË RREGULLOREN “PËR INSTRUMENTET
E PAGESAVE ELEKTRONIKE”**

Në bazë dhe për zbatim të nenit 1 pika 4 shkronja “b”; nenit 21, nenit 43 shkronja “c” e ligjit nr. 8269, datë 23.12.1997 “Për Bankën e Shqipërisë”, të ndryshuar; nenit 126 të ligjit nr. 9662, datë 18.12.2006 “Për bankat në Republikën e Shqipërisë”, i ndryshuar, me propozim të Departamentit të Sistemeve të Pagesave dhe Departamentit të Mbikëqyrjes, Këshilli Mbikëqyrës i Bankës së Shqipërisë

VENDOSI:

1. Në rregulloren “Për instrumentet e pagesave elektronike” miratuar me vendimin nr. 11, datë 06.02.2008 të Këshillit Mbikëqyrës të Bankës së Shqipërisë, të bëhen ndryshimet e mëposhtme:

a) Në nenin 3, pika 1, pas togfjalëshit “degët e bankave të huaja” shtohet togfjalëshi “si dhe institucionet e parasë elektronike, të licencuara nga Banka e Shqipërisë”;

b) Shkronjat “f”, “g”, “h” dhe “i” të nenit 4 shfuqizohen;

c) Shkronja “e” e nenit 4 ndryshon, me përmbajtje si më poshtë:

“Shërbime të tjera elektronike bankare – janë shërbimet bankare të realizuara online, të tilla si: home banking, të cilat mund të aksesohen nga klientët e subjekteve të kësaj rregulloreje, nëpërmjet përdorimit të mjeteve të ndryshme të telekomunikacionit, si për shembull, telefoni, celulari, terminalët ose kompjuterat personalë etj.”;

d) Shkronja “k” e nenit 4 ndryshon, me përmbajtje si më poshtë:

“Emetues – janë banka, dega e bankës së huaj ose institucioni i parasë elektronike, të cilët emetojnë IPE, sipas kontratës me mbajtësin e IPE-ve.”

e) Në nenin 7, pika 1, pas togfjalëshit “degët e bankave të huaja”, shtohet togfjalëshi “dhe institucionet e parasë elektronike”.

f) Paragrafi 1 i nenit 22 ndryshon, me përmbajtje si më poshtë:

“Shlyerja e pagesave në lekë/valutë me kartë bankare të emetuar në territorin e Republikës së Shqipërisë, kryhet nëpërmjet shoqërive ndërkombëtare të kartave apo ofruesve lokalë të shërbimeve për pagesa, me karta dhe/ose bankave korrespondente të huaja, në përputhje me marrëveshjet dy ose shumëpalëshe, të lidhura ndërmjet emetuesit/pranuesit me shoqëritë e kartave apo me ofruesit lokalë të shërbimeve për pagesa me karta.”

g) Në nenin 22, paragrafi 2, pas togfjalëshit “me shoqëri ndërkombëtare të kartave” shtohet togfjalëshi “apo me ofruesit lokalë të shërbimeve për pagesa me karta”.

h) Neni 23 dhe 25 shfuqizohen.

i) Neni 26 ndryshon me përmbajtje, si më poshtë:

“1. Instrumentet e parasë elektronike mund të jenë në formën e:

a) kartave të parapaguara, të cilat paraqiten si karta plastike me fuqi blerëse; dhe

b) produkteve të parapaguara, të cilat konsistojnë në programe të veçanta, që i mundësojnë mbajtësit, transferimin e parasë elektronike nëpërmjet rrjeteve elektronike të komunikimit.

2. Lista e instrumenteve të parasë elektronike të përcaktuara në pikën 1 të këtij neni, nuk është shteruese dhe varet nga zhvillimet e mëtejshme të teknologjisë.”

j) Pas nenit 26, shtohet neni 26/1, me përmbajtje si më poshtë :

“Neni 26/1
Raste përjashtimore

Për qëllime të kësaj rregulloreje, nuk do të konsiderohet si para elektronike:

a) vlerat monetare që ruhen në instrumente të parapaguara, që përdoren me qëllimin për të përmbushur nevoja specifike të klientëve dhe që mund të përdoren në mënyrë të kufizuar sepse:

i) i japin mundësinë mbajtësit të blejë mallra dhe/ose shërbime të caktuara, të ofruara nga emetuesi vetëm në ambientet ku zhvillon veprimtarinë emetuesi i parasë elektronike ose brenda një rrjeti të përcaktuar ofruesish shërbimesh, subjekte të një marrëveshjeje tregtare me emetuesin e parasë elektronike (një dyqan i caktuar, zinxhir dyqanesh etj.); ose

ii) mund të përdoren për të blerë vetëm një numër të kufizuar mallrash dhe/ose shërbimesh.

b) vlera monetare që përdoret për të blerë mallra ose shërbime dixhitale dhe që përdoren vetëm nëpërmjet një pajisjeje dixhitale, të tillë si kompjuter dhe/ose telefon celular, për aq kohë sa operatori i komunikimeve elektronike, IT ose dixhital nuk luan vetëm rolin e një ndërmjetësi midis përdoruesit të shërbimit të pagesave dhe ofruesit të mallrave.”

k) Neni 27 ndryshon, me përmbajtje si më poshtë:

“Neni 27

Emetimi i parasë elektronike

1. Emetuesi i parasë elektronike emeton para elektronike për një vlerë të barabartë me vlerën nominale të fondeve të marra nga mbajtësi i parasë elektronike.

2. Mbajtësi i parasë elektronike është pronari i fondeve që pranohen nga emetuesi i parasë elektronike për emetimin e parasë elektronike.

3. Emetuesi i parasë elektronike dhe mbajtësi i parasë elektronike lidhin një kontratë me shkrim, me qëllim krijimin dhe rregullimin e marrëdhënies për emetimin e parasë elektronike.

4. Kontrata midis emetuesit të parasë elektronike dhe mbajtësit të parasë elektronike përcakton qartë dhe në formë të kuptueshme kushtet në lidhje me emetimin dhe ripagimin.

5. Kufijtë minimalë dhe maksimalë, brenda të cilëve emetohet paraja elektronike, përcaktohen në kontratën e emetimit të parasë elektronike, duke respektuar kufijtë e mëposhtëm:

a) në rastin e instrumenteve të parasë elektronike pa rimbushje, shuma maksimale e ruajtur nuk duhet të jetë më shumë se 35 000 lekë ose kundravlehtë e saj në monedhë të huaj;

b) në rastet e instrumenteve me rimbushje, kufiri maksimal i transaksioneve të kryera brenda një viti kalendarik, nuk duhet të tejkalojë 350 000 lekë ose kundravlehtë e saj në monedhë të huaj, me përjashtim të rastit kur mbajtësi i parasë elektronike ka kërkuar ripagim, sipas kushteve të parashikuara në nenin 31 të kësaj rregulloreje për një shumë prej 150 000 lekë ose më shumë.

6. Emetuesi i parasë elektronike informon mbajtësin e parasë elektronike, para nënshkrimit të kontratës, në përputhje me shkronjën “b”, pika 1, të nenit 7 të kësaj rregulloreje.

7. Emetuesi i parasë elektronike ndalohet t’i paguajë interes ose ndonjë përfitim tjetër, mbajtësit të parasë elektronike, për periudhën gjatë së cilës ky i fundit mban paranë elektronike.”

l) Nenet 28 dhe 29 shfuqizohen.

m) Në nenin 30 fjala “shkatërrohet” zëvendësohet me togfjalëshin “asgjësohet nga emetuesi i parasë elektronike”.

n) Neni 31 ndryshon, me përmbajtje si më poshtë:

“Neni 31

Ripagimi i fondeve

1. Emetuesi i parasë elektronike, me kërkesë të mbajtësit të parasë elektronike, i ripaguan atij, në çdo moment, në vlerë nominale, vlerën monetare të parasë elektronike.

2. Ripagimi mund të jetë objekt i aplikimit të komisioneve, vetëm nëse këto të fundit

parashikohen në kontratën midis palëve dhe vetëm në një nga rastet e mëposhtme:

- a) ripagimi kërkohet përpara përfundimit të kontratës;
- b) kontrata parashikon një datë për përfundimin e saj dhe mbajtësi i parasë elektronike e përfundon kontratën, para datës së përfundimit; ose
- c) ripagimi për shumën e papërdorur, kërkohet pas më shumë se një viti, nga data e përfundimit të kontratës.

3. Në rastet kur mbajtësi i parasë elektronike kërkon ripagim, përpara përfundimit të kontratës, ai ka të drejtën të kërkojë ripagim të plotë ose të pjesshëm të parasë elektronike që zotëron.

4. Në rastet kur ripagimi kërkohet nga mbajtësi i parasë elektronike, një ose deri në një vit, pas datës së përfundimit të kontratës, emetuesi i parasë elektronike ripaguan totalin e vlerës monetare të parasë elektronike të mbartur.

5. Emetuesit e parasë elektronike, pavarësisht sa parashikohet në këtë nen, në rastet e një personi të ndryshëm nga individi (konsumatori), që pranon para elektronike, përcaktojnë të drejtën e ripagimit në marrëveshjen kontraktuale midis emetuesit të parasë elektronike dhe këtij personi.

6. Emetuesi është përgjegjës ndaj mbajtësit, në rastet kur, ky i fundit ka pësuar humbje ose dëmtim të parasë elektronike si pasojë e mosfunksionimit të pajisjes, së autorizuar nga emetuesi, për pranimin e instrumentit të parasë elektronike si mjet pagese.”

o) Pas nenit 31 shtohet neni 31/1 me përmbajtje si më poshtë:

“Neni 31/1

E drejta e mbajtësit për informim

1. Emetuesi informon mbajtësin mbi transaksionet e kryera me instrumentin e parasë elektronike si dhe mbi tepricën e fondeve të mbetura dhe të ruajtura në të.

2. Informacioni i përcaktuar në paragrafin 1 të këtij neni, vihet në dispozicion të mbajtësit me kërkesën e tij.”

p) Neni 32 ndryshohet, me përmbajtje si më poshtë:

“Neni 32

Humbja ose dëmtimi

Në rastet e verifikimit të humbjes ose dëmtimit të instrumentit të parasë elektronike, emetuesi i kthen mbajtësit fondet e mbetura, në përputhje me kushtet e përcaktuara në kontratën ndërmjet palëve.”

3. Ngarkohen Departamenti i Sistemeve të Pagesave dhe Departamenti i Mbikëqyrjes me ndjekjen e zbatimit të këtij vendimi.

4. Ngarkohet Departamenti i Marrëdhënieve me Jashtë, Integritetit Evropian dhe Komunikimit, për publikimin e këtij vendimi në Fletoren Zyrtare të Republikës së Shqipërisë dhe në Buletinin Zyrtar të Bankës së Shqipërisë.

Ky vendim hyn në fuqi 15 (pesëmbëdhjetë) ditë pas botimit në Fletoren Zyrtare të Republikës së Shqipërisë.

KRYETARI
Ardian Fullani